

bus; Host., sine ulla restrictione, in Summa, titul. de Simon.; Turrec., cum Hugone, in c. *Nullus Episcopus*, 1, quæst. 1, ubi Gloss. idem sequitur; et idem tenet Major, ubi supra; et idem generalius tenet Supplement. Gabr. ibi, quæst. 2, art. 1, prop. 7, qui reducit hæc ad jus acquisitum, quia in illis semper supponitur verum jus proprium ad talem absolutionem, vel alium similem actum; stante autem tali jure, non solum licet redimere vexationem ab eo qui jus ipsum tollere conatur, sed etiam ab eo qui injuste impedit ne tali jure uti possim; et ita etiam dixit Glossa in Regul. mor., cap. de Avarit., alphab. 29, litt. R. Et ratio constat ex dictis, quia hoc non est intrinsece malum, nec invenitur in jure prohibitum, et subest honesta causa, et sufficiens necessitas talis redemptionis; ergo. Contrariam sententiam tenuit de absolutione a censura Innoc., in d. cap. *Ad aures*, et sequitur Ugolin., Tab. 1, cap. 44, § 1, num. 5. Sed illi supponunt non separari in his redemptionem vexationis ab emptione rei spiritualis, quod verum non est, et ita non habent solidum fundamentum. Nec caput *Ad aures*, quod allegant, quicquam probat, ut legenti facile constabit.

CAPUT LI.

AN TRANSACTIO SEU PACTIO ONEROSA AD TERMINANDAM LITEM HABEAT LOCUM IN SPIRITUALIBUS ABSQUE SIMONIA?

1. *Compositio et transactio in quo differant.* — *Ad transactionem tria requiruntur.* — De hoc puncto pauca dixerunt Theologi: a jurisperitis autem latissime disputatur in variis cap. de Transact., et in cap. ultim. de Rerum permut., et in capit. *Nisi*, de Præbend., et aliis locis; nos vero brevissime attingemus quæ ad conscientie forum videbuntur necessaria. Supponimus autem primo aliud esse compositionem, aliud transactionem; omnis enim transactio compositio quædam est, non vero omnis compositio est transactio. Compositio enim habet locum in remissione gratuita, et in jure certo ac indubitato, et extra omnem litem; transactio vero proprie dicitur pactio non gratuita in re dubia, et sub incerta lite constituta, ut constat ex leg. 1, ff. et l. 2, eod., de Transact. Unde remissiones et condonationes, quas interdum facit Pontifex de fructibus beneficiorum male partis, vel de rebus restitutioni obnoxiiis, incertis creditoribus,

licet compositiones communiter appellentur, non sunt transactiones; tum quia ibi nec est ordo ad litem, nec dubium in re debita, vel in obligatione restituendi; tum etiam quia remissio, quæ ibi fit, non est proprie onerosa, sed gratuita. Nam, licet talis remissio fiat sub conditione faciendi talem eleemosynam, vel subventionem ad tale opus pium, nihilominus gratis et absolute remittitur reliquum debitum totum, et pars illa, quæ solvi præcipitur, non denuo imponitur, debita enim erat, sed solum ad tale vel tale opus applicatur. Sic etiam si creditor conveniat cum eo qui centum sibi debet, ut solvat octoginta, et remittit reliquum debitum, etiamsi nec esset in illo dubium, nec timor litis, non facit transactionem, sed compositionem liberalem. Item, si litigantes inter se conveniant ut alter omnino cedat actioni, vel rei de qua litigabant, sine ulla recompensatione vel divisione, sed omnino gratis, dicitur illa amicabile compositio, non transactio. Ad transactionem ergo tria requiruntur. Primum est, ut jus, vel res, super quam transigitur, sit incerta, seu dubia, saltem probabilis existimatione utriusque partis, alias ab altera parte fieret clara injustitia, et compositio facta ab altera parte esset potius redemptio vexationis, quam transactio. Secundum est, ut conventio sit cum aliquo onere utriusque partis, alias non esset propria transactio, sed donatio. Tertium, ut sit in ordine ad litem componendam vel dirimendam, sive lis intenta sit, sive controversia tantum mota sit, et lis intentari possit, juxta leg. *Eleganter*, § *Si quis post*, ff. de Condict. indeb., leg. 2., c. de Transact. Ratio autem horum omnium maxime consistit in usu vocum, qui ex juribus, tam civilibus quam canonicis, et interpretibus eorum sumendus est.

2. Ex hac ergo vocum interpretatione facile intelligi potest et occasio presentis questionis, et quid in ea certum sit, vel de quo possit esse nonnulla difficultas. Constat enim posse esse inter homines controversiam et litem circa materiam spiritualem, ut circa beneficia, jurisdictionem ecclesiasticam, et similia; et consequenter etiam est clarum posse similem controversiam finire per voluntariam partium compositionem, seu concordiam; imo etiam constat, frequentius expedire ita fieri, ad tollendas discordias, et litium molestias et expensas. Unde non est etiam dubium, quin possit aliquo modo licite fieri, quia cum pax et concordia maxime consentanea sit spiritualibus rebus, deesse non potest aliquis modus

honestus faciendi compositionem in controversia mota circa spiritualia bona, ita ut in tali compositione simonia non interveniat; hunc ergo modum hic inquirimus. Ut autem hæc compositio locum habeat, imprimis supponendum est verum et legitimum fundamentum illius controversiæ, quæ componenda sit; fundamentum autem est illud primum, quod proposuimus, scilicet, ut jus circa rem spiritualem, de qua tractatur, sit aliquo modo incertum vel dubium, saltem probabilis existimatione, in utroque contendente. Nam si unus habeat jus certum et indubitatum, et alius per fraudem et potentiam controversiam moveat, et litem intentet, vel minetur, ut aliquid extorqueat, tunc quidem compositio etiam fieri potest; sed, ut dixi, illa non erit transactio, sed redemptio vexationis, etiamsi fiat post litem jam motam, quia hoc non variat speciem pacti, nec honestatem ejus. Et ita de hoc casu nihil tractamus hic, sed per doctrinam præcedentis capituli judicium in illo ferendum est.

3. *Variis modis potest esse compositio de re spirituali.* — *Prima resolutio.* — Præterea supponendum est variis modis posse de facto fieri compositionem super hujusmodi controversiam de re spirituali. Primo, ut alter contententium libere et gratis omnino cedat juri suo in gratiam alterius, absque aliqua divisione rei, vel juris de quo tractatur, vel recompensatione ex parte alterius. Secundo, si res de qua tractatur divisibilis sit, et prudenti arbitrio compositio fiat per divisionem ejus, vel emolumentorum ejus inter contententes. Tertio, ut tota res uni applicetur, ipse vero de aliis rebus seu bonis suis aliquam recompensationem alteri faciat. De primo ergo modo nulla est controversia, quin ibi simonia non interveniat, quia non intervenit pactio onerosa, et is qui cedit, si aliquid juris ibi habebat, gratis illud condonat alteri; ergo nulla ibi est umbra simoniæ. Et ita ille modus compositionis maxime laudabilis est; non est autem transactio (ut dixi), sed vocari solet amicabile compositio, de qua multa jura loquuntur, et specialiter illam approbat caput *Super eo*, de Transact. Fit autem hæc compositio, vel quando altera pars liberaliter cedit juri suo, et litem deserit; vel quando litigantes amicabiliter promittunt stare arbitrio aliquorum prudentum, ut ille omnino gratis causam dimittat, quem minus probabile jus habere censuerint. Et tunc non est necessaria prælati auctoritas ex vi compositionis, secus ratione novæ institutionis aut renunciationis,

si facienda esset post datum arbitrium; nam ad illam necessaria est prælati auctoritas, ut notat Panormitan., d. cap. *Super eo*. De hac ergo amicabile compositione nulla est controversia, sed tota versatur circa secundum et tertium modum compositionis: in utroque enim salvatur propria ratio transactionis, quia in utroque vere intercedit pactio onerosa, seu non gratuita, et de re dubia spirituali, ac lite incerta, quia per talem conventionem uterque renunciat aliqua ex parte juri quod pretendebat, et non omnino gratis, sed aliquid etiam lucrando et obtinendo, sive de re ipsa de qua erat lis, sive de alia; hoc enim nihil refert quominus pactio gratuita non sit, quandoquidem semper commutatur jus dubium circa rem totam pro aliquo jure, vel dono certo.

4. *Difficultatis articulus.* — Difficultas ergo est, an hæc transactio in spiritualibus semper reprobetur ut simoniaca. Et ratio difficultatis oritur primo ex dictis, quia omnis pactio in spiritualibus simoniaca est, juxta caput ultim. de Pact., et caput *Quam pio*, cum similibus, prima, questione secunda; sed quod pactio fiat ad finem concordie et pacis, non tollit intrinsecam malitiam talis pactionis, quia non sunt facienda mala ut eveniant bona; ergo. Secundo, videtur hoc aperte definitum ob hanc eandem rationem, in dicto capite *Super eo*, et capite *Præterea*, 1, et capite ultim., de Rerum permut. In contrarium autem est, quia hic modus pacti et transactionis in spiritualibus videtur et consuetudine et jure probatus; præsertim si prælati auctoritas et consensus accedat, ut patet ex c. 1 et 2, c. *Veniens*, de Transact.; ergo signum est in se non continere simoniacam pravitatem, alias non posset prælati auctoritate robor accipere. Imo etiam sine Prælati interventu censetur valere quoad personas transigentium inter se, quamvis successores obligare non possit, non propter simoniam (alias neque inter transigentes valeret), sed quia privata conventio non potuit successores obligare, ut dicitur in dicto cap. *Veniens*; ergo.

5. *Distinctiones necessariae.* — *Regula ad hoc judicandum.* — In hoc puncto, distinguendum est tam de materia transactionis, quam de re quæ in compensationem datur. De materia enim supponimus debere esse aliquo modo spiritualem, alias transactio ad simoniam pertinere non posset. Potest autem esse aut res mere spiritualis, nullum temporale habens annexum, aut potest esse jus spirituale, habens annexam rem temporalem consequenter,

quam materiam vocamus beneficium, sive proprium beneficium sit, sive illud imitetur in prædicto modo spiritualitatis; vel potest esse spirituale quid, quasi adjacens rei temporali, seu habens temporale annexum antecedenter, quod perinde est; vel potest esse temporale spirituali annexum ut sic, id est, retinens annexionem per Ecclesiam factam; vel denique potest esse temporale, quod licet fuerit annexum rei spirituali, possidetur, et habetur ut disjunctum, et separatum a jure spirituali, sicut decimæ possidentur a laicis, vel commendæ. Similiter id quod datur in compensationem potest esse vel aliquid spirituale ejusdem rationis et ordinis, vel aliquid spirituali annexum, vel aliquid mere temporale. Ad judicandum ergo de transactione, oportet considerare quid pro quo commutetur, et applicanda sunt generalia principia de simonia. Et in hoc sensu dixit Sylvester, verb. *Transactio*, vers. *Secundum*, in fin., transactionem licere ubi non intervenit simonia, non licere autem ubi intervenit. Quia vero hoc ipsum est quod inquirimus, quando, scilicet, interveniat vel non interveniat simonia, addit hoc per applicationem definitionis simoniæ judicandum esse. Quod per sequentes propositiones breviter fieri potest.

6. *Prima conclusio.* — Dico primo: transactio in qua jus spirituale pro aliquo temporali remittitur vel retinetur, est mala et simoniaca. Est certa et communis sententia: tenet Gloss., 1, in capite 2, et in capit. *Super eo*, de Transaction., et ibi Innoc., Panormitan., et alii; Major., in d. 25, quaestione 5, ad 4; Sylvest., Angel., Tabien., et alii Summistæ, verb. *Transactio*. Et habetur expresse hæc decisio in capit. *Cum pridem*, de Pact., et capite secundo, de Arbitris, capite *Præterea*, primo et secundo, de Transaction., et capite ultim. de Rer. permut. Ratio vero est clara, quæ in principio facta est, nam in transactione revera fit quædam permutatio, quæ sub venditione comprehenditur, quando pretium intervenit; cum ergo transactio fit, remittendo spirituale pro temporali, venditur spirituale ab eo qui illud remittit, et e converso si retinetur, et quasi firmatur spirituale, dato temporali, emitur aliquid spirituale. Declaratur ex dictis de redemptione vexationis; diximus enim debere esse jus certum, ut redemptio vexationis locum habeat, quia si sit dubium, non vexatio redimitur, sed ipsum spirituale per pecuniam quasi confirmatur et retinetur; sed in transactione supponitur

jus spirituale dubium; alias non esset transactio, ut diximus; ergo nullo modo licet jus illud pecunia redimere, quod fieret per illam transactionem. Atque hæc regula formaliter applicata habet locum in omni genere spiritualium, si suam spiritualitatem retineant saltem per annexionem; nam si hanc amiserint, jam non sunt proprie spiritualia; et quid de illis dicendum sit, infra videbimus.

7. *Non licet in transactione spiritualium dare pecuniam.* — Igitur si spiritualis jurisdictio in litem vocetur, non licet transigere dando pecuniam, nam est clara simonia, de qua in d. capit. *Præterea*, 2. Item si beneficium sit litigiosum, non licet componere litem, vel dando pecuniam auctori ut desistat, vel recipiendo ab illo pecuniam, juxta d. cap. *Constitutus*, et relinquendo illi beneficium. Quomodo autem liceat, acceptando pensionem transigere, infra dicemus. Item, si de jure præsentandi quaestio sit suborta, non licet transigere dando pecuniam alteri ut desistat, ut in d. c. *Præterea*, 1. Item, si de rebus sacris, verbi gratia de reliquiis, controversia oriatur, non licebit transigere, data vel accepta pecunia, quia eadem ratio simoniæ intervenit; idemque cum proportione esset de aliis rebus sacris, in quibus temporale est annexum antecedenter spiritualitati, si ratione spiritualitatis magis aestimarentur ad transactionem faciendam altiori pretio; nam, si solum materiale in eis consideretur, sicut vendi possunt, ita etiam super eas transigi poterit, ut constat. Denique si de officio ecclesiastico, quod per Ecclesiam ita est annexum spiritualibus, ut ex prohibitione ejus vendi non possit, lis oriatur, non poterit pecunia componi, quia illa etiam est quædam simonia contra jus positivum, nisi dispensatio prælati intercedat.

8. *Secunda conclusio.* — Dico secundo, transactionem in materia spirituali non beneficiabili cum aliqua compensatione per largitionem, vel cessionem alterius rei, vel juris spiritualis proportionati, non esse simoniacam, et ideo fieri posse de consensu partium absque auctoritate prælati, quantum est ex vi transactionis. Hanc assertionem sumo ex Abbate, in d. cap. 2, et capit. *Super eo*, de Transact., cum Innoc. et aliis ibi. Probatum autem ratione, quia hujusmodi transactio neque est intrinsece mala, tanquam simonia contra divinum jus; nec etiam est jure ecclesiastico prohibita; ergo. Prior pars antecedentis probatur, quia datio et acceptio spiritualis pro spirituali non est simonia contra divinum jus, ut supra

probatum est; sed in hoc modo transactionis nihil aliud fit; ergo. Et similiter probatur posterior pars, quia similis permutatio propria auctoritate facta non est prohibita jure ecclesiastico extra materiam beneficiorum, et ea quæ illam concernunt, ut supra etiam ostensum est; ergo idem est de transactione, præsertim quia nulla potest assignari talis prohibitio specialis.

9. Potestque hæc regula applicari fere ad omnia exempla proxime data; nam si contentio sit de jurisdictione spirituali, posset fieri transactio, ut alternis visitent, aut eligant, aut præsentent, si de his juribus lis oriatur; vel si Episcopi contendant de jure in aliquam ecclesiam, possent convenire ut unus jurisdictionem, alius provisionem beneficiorum in illa habeat. Similiter si de rebus sacris lis esset, ut de reliquiis, possent litigantes per transactionem illas inter se dividere; vel si non expediret dividere, posset res quæ in litem adducitur, uni applicari sub conditione, ut aliam reliquam alteri parti donaret. Non tamen posset tunc compensari per rem sacram pretiosam ex parte materiæ, quia censeretur potius dari ratione materiæ, ratione cujus vendibilis est, et ideo diximus in hac transactione servandam esse proportionem. Item in rebus annexis ad spiritualia maxime locum habet hæc transactio in decimis, quando de illis est lis, et fit conventio ut unus partem quamdam habeat, alius aliam; vel si monasterium cum Episcopo vel alio monasterio litiget de fructibus alicujus ecclesiæ sibi unitæ, potest compositio fieri, vel partem fructuum relinquendo alteri, vel alterius ecclesiæ fructus, et sic de aliis, quæ communia sunt apud auctores, quia in illis omnibus non invenitur commutatio spiritualis pro temporali, sed spiritualis pro spirituali, et annexi pro annexo cum proportione. Quæ non est prohibita in jure, imo ex multis juribus vel aperte, vel per æquivalentiam sumi potest. Ut ex capit. *Ad quaestiones*, de Rer. permut., capit. *Cum venerabilis*, de Censib., c. *Constitutus*, de Relig. dom., c. *Ex multiplici*, de Decim.

10. Solet autem interdum in his transactionibus auctoritas prælati postulari, ut in capit. 2, de Transact. Et ad hoc insinuandum, et exceptionem aliquam faciendam, addidi in assertionem, *quantum est ex vi transactionis*; nam illa de se, ut careat vitio simoniæ, non requirit auctoritatem prælati; tamen ut valeat, poterit aliunde illa indigere. Primo, si res spiritualis, quæ in recompensationem datur,

in dubium non vocetur, sed extra litem sit, et ad illam conferendam alteri sit necessaria auctoritas prælati. Et ideo prælatus ipse interdum potest jus aliquod spirituale certum alteri dare, ut recedat a lite super alio spirituali jure, inferior autem hoc facere non poterit sine consensu sui prælati, ut in ultima parte assertionis insinuavi. Postulatur autem hæc prælati auctoritas, ut talis transactio possit esse perpetua; nam ut valeat inter personas, non est necessaria, ut constat ex capite *De cætero*, eod. Continet enim interdum hæc transactio quamdam alienationem honorum ecclesiasticorum, et ideo, ut firma sit, auctoritas prælati necessaria est, imo et aliæ conditiones ad talem alienationem necessariæ postuluntur, de quibus alibi. Quando autem cum laicis fit transactio super decimas ex speciali juris dispositione, Pontificis confirmatio necessaria est, juxta capit. *Veniens*, de Transaction., et cap. *Venerabiles*, de Con. util. vel inutil., et capit. *Decimas quas*, 16, quaest. 7, de quo aliquid attigimus cap. præced., et videri possunt dicta supra, tract. 2, lib. 1, cap. 5.

11. *Tertia conclusio.* — Dico tertio: In materia beneficiabili non est licita transactio, etiamsi in ea spirituale pro spirituali transigatur, quando illa propria auctoritate litigantium fit, vel ad arbitrium privatum virorum prudentum; auctoritate autem prælati poterit honestari. Prior pars communis est Innocent., Panormit. et aliorum, in c. *Constitutus*, et d. c. *Super eo*, qui ita intelligunt illa jura, quatenus simpliciter damnant omnem transactionem in spiritualibus, nam in beneficiabilibus potissimum loquuntur. Idem Gloss., in capite *Si quando*, de Offic. deleg.; Gloss., in capite *Ea quæ*, 1, quaestione 3. Idem Præpos., in capit. *Quam pio*, 1, quaestione 2, num. 2; Deci., cons. 436, numer. 18; Rebuff., in Pract. Cancellar. Apostol., versus finem; Lamber., de Jure patron., lib. 3, quaestione 9, articulo 6. Fundamentum hujus assertionis non est sumendum ex solo jure naturali; nam ex vi illius permutatio spiritualis pro spirituali non est simoniaca, ut supra dictum est; eadem autem ratio est de transactione, ut constat, et statim etiam dicitur. Quapropter non mihi probatur ratio, qua in hoc utitur Sylvester, nimirum, transactionem in beneficiis involvere simoniam, quia beneficium non est pure spirituale, sed habet annexum temporale; unde si fiat transactio, semper dabitur temporale pro spirituali, vel e contrario. Hæc (inquam) ratio mihi non placet, ut per se sufficiens ex sola rei natura, quia

permutatio beneficiorum ex natura rei non esset simoniaca, si non esset prohibita, ut omnes pro comperto habent, et tamen ibi etiam intervenit temporale annexum spirituali; ergo idem est in transactione, ex natura rei loquendo, quia transactio in beneficiis, dando spirituale pro spirituali, nihil aliud est quam quædam permutatio facta ad conciliandam pacem, ut exemplis statim declarabimus. Et ratio est, quia, licet in beneficio sit temporale, vel non consideratur ut tale, quia accessorium sequitur naturam principalis, vel certe potest servari proportio, ut spirituale intelligatur dari pro spirituali, et temporale pro temporali; nec oportet ea miscere, aut commutationem inverti, juxta capit. *Ad questiones*, de Rer. per. Igitur ex vi solius divini juris hæc transactio non est simoniaca, nec aliter mala, si debito modo fiat.

12. *Fundamentum assertionis.* — Fundamentum ergo sumendum est ex jure positivo quo talis transactio prohibita est, facta sine auctoritate Episcopi. Quod imprimis colligi potest ex cap. *Constitutus*, ubi de transactione in beneficio sermo est, et dicitur habere speciem simoniæ. Et quamvis in casu ibi proposito non explicetur qualis fuerit transactio, sed absolute dicatur, *hinc inde fide præstita*, nihilominus cum Pontifex respondens nihil distinguat, nec nos distinguere possumus, aut limitare responsionem ad transactionem, in qua temporale datur pro beneficio, sed absolute de quocumque pacto oneroso intelligenda est. Et hoc confirmat capit. *Super eo*, ibi: *Alias, si gratis et amicabilem inter se litigantes componant.* Hæc enim exceptio firmat regulam in contrarium; omnis ergo compositio quæ hujusmodi non est, prohibita est in hac materia; sed non potest dici compositio gratuita, quæ fit cum onere dandi et recipiendi aliud beneficium, aut quid simile; ergo. Habet tamen ille textus aliam difficultatem, quam infra attingam. Confirmari etiam hoc potest ex capite secundo, de Transaction., ibi: *De assensu Episcopi, vel Archiepiscopi sui*: ubi hæc ponitur ut conditio necessaria, et (ut ita dicam) pertinens ad validitatem, et quasi ad formam transactionis; ergo ubi deest illa conditio, transactio est prohibita. Est autem ibi sermo de transactione super decimas; multo ergo magis habet locum illa decisio in transactione super beneficia. Denique hoc videtur sufficienter probari ex generalibus regulis, quod in beneficiis aliquo modo acquirendis omnis pactio et conventio, omnisque per-

mutatio, etiamsi sit de spirituali ad spirituale, prohibita est; sed transactio inter hæc pacta onerosa continetur, ut constat, et per illam acquiritur beneficium aliquo modo, vel quia, cum jus sit dubium, fieri potest ut in re sit nullum, et per illam pactionem obtineatur; vel si in re est verum, erat infirmum et dubium, et ita aliquo etiam modo acquiritur, dum fit certum per tale pactum.

13. *Tripliciter potest fieri hæc transactio.* — *Primus modus.* — Ut autem hæc conclusio magis explicetur, utile erit proponere tres modos, quibus hæc transactio fieri potest. Unus est, quando contenditur de uno beneficio tantum, et tunc non potest dari spirituale pro transigendo ex re ipsa circa quam litigatur, quia beneficium divisibile non est. Quod si pensio imponatur ex conventionione partium, mere temporale quid erit (quidquid dicat Major, dicta quæstione 5), et ita fiet transactio, dando temporale pro spirituali, quod non licet; posset autem dari aliquid spirituale, quod sit extra materiam litis, ut si litigans pro beneficio pingui det colliganti aliud beneficium, quod pacifice ipse possidet, ut sibi pacificum relinquat pingue beneficium; et talis transactio æquivaleret permutationi unius beneficii pro alio, et ideo prohibita est sine auctoritate superioris. Vel si non sit propria permutatio, erit renunciatio beneficii in favorem tertii, non gratuita, sed ex pacto, quæ ex illo duplici capite prohibita est. Aliter vero posset super unum beneficium intelligi hæc transactio, si possidens promitteret alteri, pro dimissione litis accipere illum in vicarium, si beneficium sit curatum, vel in coadjutorem, si sit canonicatus; vel si promitteret providere illum de beneficio, aut vicaria, si sit dignitas habens similes provisiones annexas, aut præsentare illum in alio beneficio, si sit patronus, vel procurare illi aliquid hujusmodi. Et in his omnibus interveniunt pacta prohibita, et magna ex parte reduci possunt ad commutationem spiritualis pro temporali, et posset aliqua ex parte applicari ratio Sylvestri supra facta. Nam pro obtinendo beneficio cum suis redditibus venditur præsentatio, aut vicaria, etc. Et e contrario promissiones interdum possunt esse pretio æstimabiles. Ita ergo nullus modus occurrit, quo possit fieri transactio circa unum litigiosum, dando vel promittendo pro illo aliquid spirituale.

14. *Secundus modus.* — Aliquando vero potest esse super plura beneficia simul; et tunc potest intelligi transactio, si inter se partes

convenient, ut unum beneficium uni detur, et aliud alteri, quod unusquisque pacifice possideat renunciando alii vel aliis. Et in hoc modo videtur esse minor ratio simoniæ, quia fit minor permutatio beneficiorum, et videntur pauciora pacta intercedere. Sed nihilominus ratione conventionis non gratuitæ non potest propria auctoritate fieri, eo vel maxime quod cum jus utriusque partis dubium sit, non potest per voluntatem transigentium dari, vel renunciari in alium, si fortasse illud non habeat, et ideo necessaria est prælati auctoritas.

15. *Tertius.* — Denique potest transactio hæc tertio modo excogitari, nimirum, si litigantes invicem sint actores, et rei, ut esse poterunt, si uterque proprium beneficium possidet, et uterque vicissim alteri moveat litem super beneficium suum; possunt autem transigere, vel ita ut convenient de permutandis beneficiis simpliciter, ut lites cessent; vel certe si unusquisque contentus suo beneficio liti cedat, dummodo alter cedat. Prior modus sine dubio non licet sine prælati auctoritate, quia ipsa permutatio illam postulat, et quod beneficia sint dubia, non minuit necessitatem, sed potius auget, quia sola prælati auctoritas potest reddere jus certum. Idemque dicendum censeo, si non petatur beneficium ex utraque parte, sed alter petat beneficium alterius, iste vero ab alio postulet aliud spirituale jus jurisdictionis, vel simile. Quia etiam permutatio beneficii pro tali jure, vel renunciatio sub tali conditione, eodem modo prohibita est, quia non est pura, sed sub modo et conditione. Posterior autem modus videtur licitus, et sine specie simoniæ prohibita; quia ibi non tam fit compositio super beneficium, quam super litem; et licet non sit omnino gratuita, non tamen fit dato pretio temporali, sed aliquo spirituali proportionato, quale est præteritum jus ad beneficium, seu illius absoluta renunciatio pro alia simili, quæ non videtur contenta in prohibitione juris, cum ibi nulla permutatio beneficiorum, nec nova acquisitio, aut renunciatio intercedat. Nec etiam antiquum jus in se melius fit, sed solum cessatur ab impugnatione ipsius; et tunc unusquisque transigentium tenebitur consulere conscientie suæ, et examinare quale sit jus, quod in suum beneficium habet, ad quod etiam teneretur ante litem motam, si dubitatio aliter orta fuisset. Manet ergo res de se in eodem statu, in quo ante litem erat, quantum ad spiritualia jura; nihil ergo spirituale acquisitum est, vel

datum, aut acceptum per illam transactionem; et ita nec est simonia, nec repugnat conclusioni positæ, quia proprie non est transactio super beneficia, sed super obligationem non litigandi mutuum et reciprocam, quæ nullo jure prohibita est in tali materia.

16. Superest ut ostendamus hanc transactionem fieri posse auctoritate Episcopi. De quo nulla est dubitatio inter auctores, ut ex d. cap. 2, de Transaction., satis colligi potest; et clarius ex generali regula supra tradita de rerum permutatione. Nam permutatio beneficiorum ex causa honesta fieri potest in manibus prælati; sed causa transactionis est satis honesta; ergo similis permutatio, vel quæcumque compensatio spiritualis facta alteri parti pro beneficio dubio, vel jure ad illud cui renunciat, si in manibus prælati fiat, valida erit, et libera ab omni simonia. Quia nec per se talis est, ut constat, nec invenitur prohibita facta illo modo, neque ullam habet speciem mali, cum spirituale pro spirituali detur, et prælati auctoritas interveniat.

17. *Dubitatio prima circa hoc.* — *Resolvitur.* — Sed quæres primo an possit Episcopus in eo casu, ordinare ut unus retineat beneficium quod in litem adducit, et de illo solvat pensionem alteri parti. Videtur enim non posse, quia ibi fit compensatio juris spiritualis pro temporali onere, quod non licet, ut ex capit. secundo, de Arbitris, et ex capit. ultim., de Rer. permut., patet. Antecedens constat, quia pensio est quid mere temporale. Respondeo, duobus modis posse hanc pensionem imponi: uno, ex mero arbitrio, et providentia prælati, qui ex conventionione partium arbiter constituitur ad transactionem componendam, quæ nihil prius inter se de pensione tractant, sed rem totam prælati arbitrio componendam relinquunt, ipse vero suo arbitrio modum illum compositionis constituit. Alio modo fieri potest ut partes prius inter se de tali modo compositionis convenient per ordinem ad consensum, et approbationem prælati, sicut supra diximus, fieri posse in permutatione beneficiorum. De priori modo nulla esse potest controversia, quin sit licitus, expresse enim approbatur in cap. *Nisi*, de Præbend., ut constat ex illis verbis: *Quod autem ordinatum est circa reliquum, ut ipse viginti libras de redditibus capituli, et quadraginta de proventibus prioratus percipiat annuatim, hoc secundum providentiam intelligitur esse præceptum ex arbitraria potestate.* Et ita docentibus Hostiens., Panor., et alii, et Gigas, referens alios, quæ-